



ՀԻՆԳԵՐՈՐԴ ԲԱԺԱՆՄՈՒՆՔ
ՀՐԱՉՅԱ ՀԱՐՈՒԹՅՈՒՆՅԱՆՆ ԸՆԴԴԵՄ ՀԱՅԱՍՏԱՆԻ

(զանգատ թիվ 15028/16)

ՎՃԻՌ

(Արդարացի փոխհատուցում. գործերի ցուցակից հանելը)

Հոդված 41 • Արդարացի փոխհատուցում • Հոդված 39 • Բարեկամական կարգավորում

Կազմվել է Քարտուղարության կողմից: Պարտադիր չէ Դատարանի համար:

ՍՏՐԱՍԲՈՒՐԳ

9 հոկտեմբերի 2025թ.

*Սույն վճիռը վերջնական է դառնում Կոնվենցիայի 44-րդ հոդվածի 2-րդ կետով
սահմանված դեպքերում: Այն կարող է ենթարկվել խմբագրական
փոփոխությունների:*

Հրայր Հարությունյանն ընդդեմ Հայաստանի գործով,

Մարդու իրավունքների եվրոպական դատարանը (Հինգերորդ բաժանմունք),
հանդես գալով Պալատի հետևյալ կազմով՝

Կատերինա Շիմաչկովա [Kateřina Šimáčková]՝ *Նախագահ,*

Մարիա Էլոսեգի [María Elósegui],

Գեորգիոս Ա. Սերդիդես [Georgios A. Serghides],

Ջիլբերտո Ֆելիչի [Gilberto Felici],

Միկոլա Գնատովսկի [Mykola Gnatovskyy],

Վահե Գրիգորյան [Vahe Grigoryan],

Սեբաստիան Բիանկերի [Sébastien Biancheri]՝ *դատավորներ,*

եւ Վիկտոր Սոլովեյչիկ [Victor Soloveytchik]՝ *Բաժանմունքի քարտուղար,*

2025 թվականի սեպտեմբերի 9-ին անցկացնելով դռնփակ խորհրդակցություն,

կայացրեց հետևյալ վճիռը, որն ընդունվեց նույն օրը.

ԸՆԹԱՑԱԿԱՐԳԸ

1. Գործը վերաբերում է դիմումատուի՝ Կոնվենցիայի 10-րդ հոդվածով նախատեսված ազատ արտահայտվելու իրավունքի խախտմանը՝ կապված վիրավորանքի եւ զրպարտության վերաբերյալ վարույթի հետ, որն իր դեմ հարուցվել է այն բանից հետո, երբ նա հայտնել է իր նախկին գործընկերոջ ենթադրյալ կոռուպցիոն գործունեության մասին՝ վերջինիս ղեկավարության հետ մասնավոր նամակագրությամբ:

2. 2024 թվականի օգոստոսի 27-ին կայացված վճռում (հիմնական վճիռ) Դատարանը որոշել է, որ տեղի է ունեցել Կոնվենցիայի 10-րդ հոդվածի խախտում (տե՛ս Հրաչյա Հարությունյանն ընդդեմ Հայաստանի [*Hrachya Harutyunyan v. Armenia*] գործը, թիվ 15028/16, § 64, 2024 թվականի օգոստոսի 27):

3. Քանի որ Կոնվենցիայի 41-րդ հոդվածը դեռևս չէր կարող կիրառվել նյութական վնասի մասով որոշում կայացնելու համար, Դատարանը հետաձգել է այն եւ առաջարկել է Կառավարությանը եւ դիմումատուին վեց ամսվա ընթացքում ներկայացնել տվյալ հարցի վերաբերյալ իրենց գրավոր դիտարկումները եւ մասնավորապես տեղեկացնել Դատարանին իրենց կողմից ձեռք բերված ցանկացած համաձայնության մասին (նույն տեղում, §67 եւ եզրափակիչ դրույթների երրորդ կետ):

4. 2025 թվականի մայիսի 12-ին եւ 16-ին Դատարանն ստացել է երկու կողմերի կողմից պատշաճ ստորագրված հայտարարությունները, որոնցով դիմումատուն համաձայնվել է, որ իր գանգատը հանվի Դատարանի գործերի ցուցակից՝ Կառավարության կողմից իրեն 2 492 000 ՀՀ դրամ վճարելու պարտավորության դիմաց՝ որպես ցանկացած նյութական վնասի փոխհատուցում՝ գումարած այդ գումարի առնչությամբ դիմումատուից գանձման ենթակա ցանկացած հարկ: Այն ենթակա կլինի վճարման Դատարանի կողմից կայացված որոշման մասին ծանուցելու ամսաթվից հետո երեք ամսվա ընթացքում: Այդ գումարը նշված եռամսյա ժամկետում չվճարելու դեպքում Կառավարությունը ստանձնում է այդ ժամկետը լրանալու օրվանից մինչեւ վճարման օրը պարզ տոկոսներ վճարելու պարտավորություն՝ չկատարման ժամանակահատվածում Եվրոպական կենտրոնական բանկի սահմանած՝ լոմբարդային ռեպոյի տոկոսադրույքի չափով՝ գումարած երեք տոկոսային կետ: Վճարումը համարվում է գործի վերջնական լուծում:

ԻՐԱՎՈՒՆՔԸ

5. Դատարանը հաշվի է առնում դիմումատուի եւ Կառավարության միջեւ Կոնվենցիայի 41-րդ հոդվածի համաձայն նյութական վնասի հարցի վերաբերյալ ձեռք բերված բարեկամական կարգավորումը: Այն համարում է, որ համաձայնությունը Դատարանի կանոնակարգի 75-րդ կանոնի 4-րդ կետի իմաստով արդարացի է: Այն նաեւ համոզված է, որ կարգավորումը հիմնված է մարդու իրավունքների նկատմամբ հարգանքի վրա, ինչպես սահմանված է Կոնվենցիայով եւ դրան կից արձանագրություններով, եւ զանգատի հետագա քննությունն արդարացնելու որեւէ հիմք չի գտնում:

6. Հաշվի առնելով վերոնշյալը՝ նպատակահարմար է գործը հանել քննվող գործերի ցուցակից՝ Կոնվենցիայի 39-րդ հոդվածին համապատասխան:

ԱՅՍ ՀԻՄՆԱՎՈՐՄԱՄԲ ԴԱՏԱՐԱՆԸ ՄԻԱԶԱՅՆ՝

որոշում է զանգատի մնացած մասը հանել իր գործերի ցուցակից:

Կատարված է անգլերենով եւ գրավոր ծանուցվել է 2025 թվականի հոկտեմբերի 9-ին՝ համաձայն Դատարանի կանոնակարգի 77-րդ կանոնի 2-րդ եւ 3-րդ կետերի:

Վիկտոր Սոլովեյչիկ

Կատերինա Շիմաչկովա

Քարտուղար

Նախագահ